

Serrada da sendas da viandar sco pusseivladad da protecziun pervia dalla preschientscha dil luf

Vella, 07-07-2020. **La vischnaunca Lumnezia ponderescha per motivs da segirtad da serrar temporarmein sendas da viandar e da velos. Ella vul cun quellas mesiras proteger viandonts e bikers dallas attaccas entras biestga e tgauns da protecziun. Ils animals ein agitai ed aggressivs pervia dalla preschientscha dil luf.**

Sin territori dalla vischnaunca Lumnezia semovan plirs trops da lufs. Silla tscherca da preda vegnan ils animals scarponts adina puspei en contact culs animals da nez sillas alps. Cauras, nuorsas e vadias vegnan meinsvart era attaccai. Ils animals da nez vegnan spuentai e tementai entras ils lufs. Per consequenza sedat ei che las muntaneras ein gnervusas e reageschan cun agitaziun sin viandonts ni sin bikers. Ils animals fuian ni ch'els attaccan schizun. La primavera eis ei schabegiau che schizun purs han stuiu scappar dall'atgna muntanera biestga per tema da vegnir splattai da quella. Era ils tgauns da protecziun ein fetg agitai e defensivs.

Nua che sendas da viandar e da velo meinan tras las pastiras dallas alps san oravontut las muntaneras da biestga, vaccas da latg e vaccas-mumma sco era ils tgauns da protecziun daventar in prighel per viandonts e bikers. Ina part dallas sendas en Lumnezia meinan aviartamein tras las pastiras d'alp. Sclauder cun seivs tut quellas sendas ei buca pusseivel. Perquei ha la vischnaunca decidiu da signalisar specialmein quellas sendas per informar viandonts e bikers co ir entuorn cun las muntaneras da biestga e culs tgauns da protecziun. Sin talas vias eis ei scumandau da menar tgauns cun ins. Las muntaners eis ei d'untgir, medemamein ils tgauns da protecziun. Ei astga en negin cass vegnir sfurzau in trapass .

Vess ei da dar incaps vegn la vischnaunca ad esser sfurzada da serrar per motivs da segirtad las sendas che meinan aviartamein sur las pastiras d'alp. Il president communal Duri Blumenthal declara: "Muntaneras ch'ein spuentadas e tementadas entras lufs san daventar sin nossas alps in prighel per hosps ed indigens. Da proteger la populaziun da quels prighels ha emprema prioritad".

La serrada dallas sendas fuss il davos pass e quel muntass ina gronda restricziun per hosps ed indigens. "La Lumnezia ei in paradis da viandar. Las sendas tras nossas pastiras ein enconuschentas e schazegiadas lunsch entuorn. Damai che nus vein ina schi gronda reit da sendas eis ei nunpusseivel da sclauder tut quellas cun seivs.

Pertuccadas dallas serradas temporaras fussen las sendas sils territoris nua ch'il luf ei activs e nua che las muntaneras ein en panica pervia da quei. Tier quellas sendas s'audan era rutas ch'ein enconuschentas ell'entira Svizra, sco la planira dalla Greina. "Deplorablamein ei era ina serrada dalla Greina buca sclausa. La segirtad da viandonts e bikers ha prioritad", di il president communal. Indigens e hosps vegnan supplicai da risguardar la signalisaziun speciala.

Contact

Vischnaunca Lumnezia
Duri Blumenthal, president communal
081 920 60 00